



Protocol

Radunanza cumünala dals 08.04.2026

Data: 08.04.2026
Urari: 20:00 fin las 21:55
Lö: Sala da gimnastica, chasa da scoula a Sta. Maria

Preschaint:

Presidi: Gabriella Binkert Becchetti, President/a
Protocol: Manuela Gross, Chanzlist/a
Suprastants: Jachen Armon Pitsch, Vicepresident/a
Leonora Leu, Suprastant/a
Chasper Stuppan, Suprastant/a
Riet Scandella, Suprastant/a

Votants: - 36 (partecipaziun da 3.16 %)

Giasts: - 2 persunas sainza dret da vuschar

S-chüsà: - Maya Repele, Aita Stupan, Flurina Oswald, Fadri Cazin, Patrick Köppe, president da la cumischiun sindicatoria, Rico Lamprecht, grond cusglier e David Spinnler

Tractandas

1. Salüd / glista da tractandas
2. Tscherna dals scrutinadurs
3. Protocol da l'ultima radunanza cumünala
4. Preschantaziun dal uffizi forestal: Persistenza aint ils gods illa Val Müstair
5. Approvaziun d'ün credit supplementar da fr. 147'045.41 pel proget forestal refacziun da vias SIE 2024 / 2025
6. Approvaziun d'ün credit da fr. 331'000.00 pel proget forestal refacziun da vias SIE 2026 / 2027
7. Varia

1. Salüd / glista da tractandas

Presidenta Gabriella driva la radunanza e spordscha il salüd a las 36 votantas e votants e'ls 2 giasts chi s'han radunats illa sala da gimnastica a Sta. Maria per la prüma radunanza cumünala dal 2026. Ün special salüd drizza ella eir a noss giasts, a Madlaina Gremlich, l'indschegnara forestala regiunala ed a Florian Flechsig, il silvicultur dal uffizi forestal.

La glista da tractandas vain preschantada da la presidenta e vain acconsentida cun unanimità, illa fuorma affischada e protramissa in mincha chasada, confuorm a l'artichel 38 da la constituziun cumünala.

2. Tscherna dals scrutinadurs

Sco scrutinadur vegn proponü ed elet sainza cuntravusch Jon Ruinatscha.

3. Approvaziun dal protocol da la radunanza cumünala dals 26.11.2025

Tenor l'art. 29 da la constituziun cumünala sto il protocol da l'ultima radunanza, in quist cas quel da la radunanzas cumünala dals 26.11.2025, gnir expost per l'invista dals votants almain ün mais davo la radunanza, d'ürant 30 dis, in chasa cumünala. L'exposiziun d'eira publichada illas tablas d'affischa da las singulas fracziuns. Recuors nu sun entrats, uschè cha'l protocol vala sco acceptà. La presidenta ingrazcha a la chanzlista per la buna e cumpetenta redacziun.

- | | |
|--------------|---|
| 4. | Preschantaziun dals resultats da l'analisa intermediara regard il plan da gestiun e la dürabilità / persistenza dal uffizi forestal |
| Affar | 2026-0044 - Analisa dal plan da gestiun e la dürabilità / persistenza dal uffizi forestal |

La presidenta Gabriella Binkert Becchetti fa üna cuort'introducziun sur dal tema principal da quista saira, chi vain surtut our da seis rapport, cul seguaint cuntgnü:

Nos manaschi forestal es üna da las pozzas fich importanta per nos cumün. D'üna vart spordschain nus bunas plazzas da lavur a noss lavuraints fich cumpetents e da l'otra vart eschan nus ün partenari fidaivel per nossa mansteranza locala e quista stretta collavuraziun vuless il Cumün da Val Müstair eir mantegner inavant.

D'avair ün forestal independent in üna vallada cun passa 50 % gods da protecziun significha per nus ün cler avantag per viver in Val plü quiet e sgür. Quist es üna gronda lezcha e sfida dal cumün da mantegner tuot las surfatschas. Per la convivenza sociala esa fich important, cha'l abitant inclegia las differentas lezchas dal forestal. Perquai chi nun es adüna simpel da declerar la chosa vain dumandà a nossa respunsabla da la Regiun Engiadina Bassa / Val Müstair, a l'indschegnara forestala e respunsabla Madlaina Gremlich, sco eir a nos respunsabel dal uffizi forestal dal cumün da preschantar lur lavur e dar ün sguard in quista materia interessanta.

Quista saira dess dar la pussibilità da pudair manar üna buna discussiun focussada a la chosa e per nos affar forestal cumünal, per cha eir nus gnin a savair voss impissamaints, vossas temmas obain eir vossas reflexiuns, chi güdan ad incleger ün oter avis. Nos böt es da pudair mantegner nossa gruppa forestala, els sun eir respunsabels pro privels da natüra, boudas e per tuot las lavurs chi nu portan adüna raps illa chascha dal cumün, chi sun però fich importantas pel bainstar e per la sgürezza da nossa populaziun.

In seguit preschainta l'indschegnara forestala regiunala Madlaina Gremlich ils resultats da l'analisa intermediara regard il plan da gestiun e la dürabilità / persistenza i'ls gods da la Val Müstair.

La persistenza significha cha'l god dess accumplir sias funcziuns permanentamaing ed illimitadamaing. Il god ha plüssas funcziuns: protecziun cunter privels da natüra (la plü importanta), producziun da laina, recreaziun e spazi da vita per plantas ed animals.

La respunsabilità pels gods in Grischun es per gronda part pro'ls cumüns, chi sun sco in Val Müstair eir ils principals proprietari. Tenor la ledscha federala sto il god gnir cultivà uschè cha'l possa accumplir sias funcziuns da protecziun, producziun e prosperità,

permanentamaing ed illimitadamaing. Impustüt aint il god da protecziun ha il Chantun, respectiv l'indschegnara regionala forestala il dovair da garantir üna cultivaziun minimala ed quellas masüras sustegna il Chantun fermamaing. La protecziun cunter privels da natüra resta però üna lezcha dals cumüns. In general collavuran Confederaziun, Chantun e cumün strettamaing.

Daspö ils ons 1980 sun ils cuosts per cultivar il god creschüts ferm e surpassan suvent ils rechavs da la vendita da laina. Perquai vegnan pajadas contribuziuns da la Confederaziun e dal Chantun. Quistas vegnan calculadas sün basa da la surfatscha cultivada e na da la quantità da laina. Ils proprietaris ston però portar svesch almain 20% dals cuosts.

L'analisa illa Val Müstair muossa cha la qualità da las lavurs es buna, ma cha la surfatscha cultivada es plü pitschna co planisà. Quai pervi da dons da natüra, magliascorzas, müdamaint dal clima, mancanza da resursas ed ün marchà da laina difficil.

Sün basa da la analisa s'ha elavurà cumünaivelmaing ün strategia per optimar la situaziun cun böts adattats per la segunda fasa dal plan da gestiun chi düra dal 2026 fin 2030:

- Focus da las masüras sün las surfatschas cultivadas, valor da böt: 50 – 60 ha / on cultivà aint illa PS2
- Augmentar eir la surfatscha da cultivaziun aint ils gods giuvens ed impustüt aint illas saivs implantadas i'l passà
- proseguir sco fin uossa cun plantaziun punctuala da bös-chs adattats pel clima

Ushè stuvesch gnir augmentada la surfatscha cultivada, impustüt aint ils gods giuvens e promovüdas spezchas adattadas al clima. Cun quistas masüras ed in collavuraziun cun la Confederaziun, Chantun e'l cumün resp. forestal dess gnir garanti, ch'eir in futur restarà il god illa Val Müstair perdüraivel, multi funcziunal e fa seis important servezzan a favur da tuot la populaziun.

Jörg Clavadetscher muossa il svilup dal persunal forestal dal 2009 – 2025 e las lavurs cha'l uffizi forestal dal Cumün da Val Müstair realisescha in congrual culs forestals in Chantun. El muossa la volatilità dal predsch da laina e declera ch'eir Corona sco eir la guerra in l'Ucraina han ün'influenza sül predsch da la laina. El declera cha la sandà dal god da la Val Müstair es buna e quai dà curaschi d'elavurar plü intensiv e da tagliar daplü laina per raggiundscher ils böts dal plan da gestiun fin dal 2030.

Discussiun:

- Gian Giachen Toutsch dumonda cha sort da bos-cha sun las plü adattadas pel clima in avegnir.
- Madlaina Gremlich declera cha quai dependa fermamaing dal stadi dal clima, dal lö, dal terrain e.o.p. Actualmaing sun quai in prüma lingia bos-cha da föglia, sco p. ex. ascher co fingià avantman vers il Tirol dal Süd, o eir tieu. In avegnir as sto observar co cha'l cunfin dal god as sviluppa, lura pudess eir tigl o ruver esser adattats. Quai però as vezza pür a lunga vista (50 – 60 ons).
- Jörg Clavadetscher agiundscha cha la WSL (institut svizzer da la scienza dal god e da la cuntrada) ha 42 implantaziuns da test in Svizra. Üna da quellas as rechatta in Val Müstair a Cuoir. Quist proget da test düra ca. 30 ons ed es cumplettamaing sustgnü dal Chantun. A Cuoir sun gnüdas implantadas 6 sorts da bos-cha: fau, tigl, tschirescher, petsch, avez, ed ascher.
- Hanjörg Weber dumonda co cha la strategia dal forestal guard'oura per raggiundscher ils böts e scha las lavurs vegnan fattas cun agen persunal o cun agüd d'impressaris.
- Jörg Clavadetscher declera cha'l böt es da tegner il persunal sco fin uossa, per lavurs supplementaras nu basta però las resursas existentas, uschè cha'l forestal es dependent dal sustegn dals impressaris.

- La presidenta declera chi'd es üna gronda sfida da chattar personal. Pel mumaint rivain da realisar las lavurs in Val Müstair be grazcha a bunas sinergias cun l'economia privata. Ella exprima grond'ingrazchamaint per la buna collavuraziun culs impressaris.
- Mario Gross-Bass declera chi nu's po simplamaing transferir ils predschs da laina da la statistica da la SELVA sün la Val Müstair. Cun resguardar ils cuorts viadis da transport stuvevan ils predschs esser plü ots. El dumonda la media dal predsch per laina da dschember, larsch e petsch.
- Jörg Clavadetscher stuveva pür calcular il predsch e nu po perquai dar üna resposta concreta. El conferma però cha'l predsch per laina da petsch es actualmaing cleramaing sur la media da SELVA, surtut pervi dals cuorts transports fin illa resgia. Pro laina da larsch e dschember correspuonda il predsch plü o main a la media. Daspö 3 – 4 ons venda l'uffizi forestal la laina sur la HVM GR, chi cugnuoscha bain il marchà, da quai profita eir l'uffizi forestal. Laina da larsch es limitada e fich tscherchada, uschè cha'ls predschs han augmantà ils ultims ons.
- Flurin Bott dumonda scha illa surfatscha prevista da 60 ha es cumprais la cultivaziun dal god giuven sco eir ils tagls da laina.
- Madlaina Gremlich declera cha tenor il plan da gestiun vegnan resguardats be ils tagls da laina in gods creschüts.
- A Flurin Bott para quai pac schi's guarda cha vain 4'000 ha god productiv. Sün 40 ons füssan quai 100 ha l'on. Implü existan bieras surfatschas da god giuven chi ston gnir mantgnüdas, chi sun eir fich importantas. La cifra til para uschè relativmaing bassa.
- Madlaina Gremlich conferma cha la cultivaziun dal god giuven es fich importante, ma chi nun es gnüda resguardada illa grafica muossada e sto gnir rinforzada (actualmaing ca. 30 % suot il böt dal plan da gestiun). Las 60 ha da cultivaziun dal god creschü sun fixadas i'l plan da gestiun (2019 – 2030) approvà dal Chantun e correspuondan, cun resguard al cresch e la situaziun actuala dal god, al böt dal forestal. Il nouv plan da gestiun vegn elavurà a partir dal 2031.
- Flurin Bott e Madlaina Gremlich conferman cha la cultivaziun dal god giuven es fich importante pel avegnir e nu das-cha gnir negligida.
- Jörg Clavadetscher infuorma cha quist on ha lö darcheu ün cuors da giarsuns in Val Müstair, ingio chi vegnan eir fattas lavurs da cultivaziun dal god giuven.
- La presidenta declera ch'eir da la vart dal cumün füss giavüschabel da tagliar daplü laina, ma eir la funcziun da protecziun dal god es fich importante. Nus stuvain resguardar il svilup dal personal ils prossems ons e scha quel po gnir augmantà, sarà eir pussibel d'adattar la quantità da la cultivaziun dal god i'l nouv plan da gestiun a partir dal 2031.

La presidenta ingrazcha a Madlaina per la preschantaziun e pel sustegn, sco eir a Jörg e Florian per las fadias, als collavurats pel ingaschamaint ed a la mansteranza indigena pel sustegn e la buna collavuraziun.

- 5.** Approvaziun dal credit supplementar da fr. 147'045.41 pel proget forestal refacziun da vias da god SIE 2024 / 2025
- Affar:** 2026-0029 - Sanaziun da las vias da god SIE 2024 / 2025
- Nr. da decisiun:** 2026-63

La presidenta declera cha las lavurs per quists progets sun statts fich importantas ed il resultat es dal sgür gratià eir schi ha dat cuosts surplü. La presidenta da il pled a Jörg Clavadetscher, chi dà las spiegaziuns in merit.

Jörg infuorma sur da mincha oget dal proget SIE 2024 / 2025.

Via Lü – Regi Sur:

Pro las lavurs vi dal oget Lü – Regi Sur chaschunaiva l'ora impustüt d'ürant l'utuon 2024 gronds problems. Üna gronda part da la scarpada sur la via es sglischida giò. Quist perimeter es gnü sustgnü e spalüdà cun gera. L'access da la deponia da material uffiziala Crippel da la Chalchera es fich delicat, impustüt d'ürant periodas da trid'ora. Causa la zona da fabrica lung la via da god ed ils problems cull'aua da surfatscha, cha'l UCB vaiva annunzchà d'ürant la fabrica, as haja decis da catramar ün traiget plü lung, co preventiva.

Via Ramoschin:

Pro la planisaziun dal proget es la surtratta da beton gnüda valütada sco buna. D'ürant la fabrica as ha demuossà impustüt illa part giosom vers la prada, cha la surtratta da beton nu d'eira plü dapertuot stabila avuonda. In quists contuorns es gnü reagi in quel möd, cha l'UGP ha deliberà ün credit supplementar aint ils roms dal proget SIE 2024 / 2025. Quist credit supplementar da frs. 70'000.- vaiva la suprastanza cumünala eir deliberà in sia sezzüda dals 28.10.2025.

Diversas scarpadas as preschantaivan d'ürant la fabrica bler plü deblas e plü bletschas, co previs.

Via Guad:

D'ürant la prümavaira 2024 ha la cumbinaziun tanter bunatscha e plövgia chaschunà dons vi da la via vers Guad. Il credit per la refacziun da quels dons ha la suprastanza als 02.07.2024 deliberà. Quist credit es gnü dat liber quella jada sco proget singul cul nom «SIE strasoras 2024». Da quel temp nu d'eira amo avantman la conferma definitiva dal Chantun, cha quista lavur gnarà sustgnüda cun subvenziuns. Davo la realisaziun da las lavurs bsögnaivlas vi da la via da Guad, ha'l Chantun confermà, cha quistas lavurs vegnan sustgnüdas sco proget «SIE 2024 Unwetter» e cun quai eir integradas aint il proget «SIE 2024 / 2025». Pervi da quai as haja davopro il proget «SIE strasoras 2024» illa contabilità cumünala eir integrà aint il proget «SIE 2024 / 2025».

Tuot las cundiziuns imprevisas han chaschunà pro'l proget SIE 2024 / 2025 il surpassamaint da cuosts da frs. 147'045.01. Adonta dal surpassamaint as po valütar las lavurs realisadas tuottafat positiv. Il cumün ha uossa sün quists tragets darcheu ün'infrastructura d'ota valur e qualità.

Discussiun:

- Andreas Rüegg dumonda scha'ls cuosts supplementars vegnan eir subvenziunats dal Chantun.
- Jörg Clavadetscher conferma ch'eir ils cuosts supplementars vegnan sustgnüts il medem rom dal Chantun e cha la dumonda da subvenziun es fingià gnüda inoltrada. Il pajamaint final rivarà in mai 2026.

Decisiun:

Cun 35 vusch da schi, pro 1 vusch da na, vain il credit supplementar da fr. 147'045.01 pel proget da la refacziun da las vias da god SIE 2024 / 2025 acconsenti.

6. Approvaziun dal credit da fr. 331'000.00, pel proget forestal refacziun da vias da god SIE 2026 / 2027

Affar: 2026-0046 - Refacziun da las vias da god SIE 2026 / 2027

Nr. da decisiun: 2026-64

La presidenta manzuna cha la Val Müstair ha bleras vias per ün'utilisaziun multifaria. D'üna

vart pel forestal e'ls tagls da laina e'l manaschi in general e da l'otra vart, per l'agricultura e las activitats dal temp liber, turisticas. Natüralmaing füss giavüschà cha mincha via füss in ün stadi exemplaric, nus stuvain e provain da far pass per pass per pudair finanzia il mantegniment da las vias. La munaida fich preziusa vegn daspö blers ons dal Padrinadi svizzer per cumüns da muntogna ed il rest sto finanzia il cumün. La presidenta surdà il pled a Florian Flechsig.

Florian declera cha'l proget Chantunal «refacziun vias (SIE)» ha sco böt principal da mantegner l'access forestal existent tras la refacziun da las vias chi sun in ün nosch stadi. La realisaziun es limitada sün 2 ons. La fabrica da vias novas es esclusa.

In quist proget sun previsas masüras vi da las seguaintas vias:

Lü – Valmorain

La via dal proget Alp Valmorain es necessaria pel access dal god da protecziun, per mantgnair las ouvras da protecziun e per cultivar las alps Valmorain e Tabladatsch. Actualmaing as rechatta l'access sün üna lunghezza da ca. 1 km in ün nosch stadi. Per garantir eir in futur l'adöver e la sgürezza ston gnir reparadas urgiaintamaing ouvras da sustegn da la vart da la val, surtratta da la via, punts e spalüdaments.

Fuldera – stradun vegl

Il «Stradun vegl» a Fuldera es relevant per l'access da las surfatschas agriculas e forestalas i'l territori da Palüds, Fuldera. Plünavant es l'access üna part integrala da l'infrastructura turistica chi vegn dovrada d'ürant l'inter on (loipa, sendas da viandar, rutas da velo). Il mür sech da crappa existent da la vart da la val vain schmachà fermamaing vers inoura ed es in ün stadi alarmant, uschè cha l'utilisaziun futura da l'avertüra es periclitada. Il mür es üna part integrala da l'inventar federal da las vias da trafic istoricas (inventar IVS) e sto perquai perquai gnir reparà tenor il stadi actual. Medemmamaing vegnan reparadas e cumplettadas differentas allontanaments per lung e transversalas.

Suotvart ils cuosts dals progets e'l pè da subvenziun fixà tenor la decisiun da princip dal Chantun:

SIE24	total cuosts proget (CHF)	pè da subvenziun
Lü – Alp Valmorain	272'000.--	68 %
Fuldera – stradun vegl	59'000.--	46 %

Decisiun:

Cun 35 vusch da schi, pro 1 vusch da na, vain il credit da fr. 331'000.00 pel proget da la refacziun da las vias da god SIE 2026 / 2027 acconsenti.

7. Varia
Affar: 2026-0006 - Varia 2026

Infuormaziuns da la presidenta, surtut a protocol our da seis rapport:

Sviament Sta. Maria:

Davo cha nus vain scrit a la regenta dal departament, duonna Carmelia Maissen, per ingrazchar pel proseguiment e per dumandar ils prossems pass, s'ha visità il nouv manader da l'uffizi, sar Simeon. Quista stà gnaran fattas provas geologicas suot la Muranzina e davo dà il chantun Grischun l'incumbenza da far ün stüdi dal ambiant. Il chantun Grischun es landervia ed in duos ons füss il proget lura uschè inavant, cha la populaziun pudess verer la via concreta. Sperond chi nun aintran ingüns recuors, chi fan be malavita e pudessan retardar la realisaziun, pudess il sviament gnir bainbod concret. Per quietar il trafic d'ürant las fin

d'eivnas da stà (gün fin avuost), gnaran darcheu ils cadets dal chantun Grischun, in nom dal cumün, a reglar il trafic a Sta. Maria.

Lavurs sanaziun chasa da scoula a Müstair:

Las lavurs van bain inavant e nus eschan i'l temp. Las sfidas da sanar ün abitacul vegl dal on 1969 sun magara grondas ma survisiblas. Quels chi han eir fingià renovà üna chasa veglia savaran quai. Nus vezzain cha la mansteranza as dà gronda fadia. Ils architects sun adüna al lö e mincha mais pudain scriver oura ün bel paket da lavurs. l'ns fa grond plaschair cha'l marchà in val funcziuna bain e cha nossa mansteranza ha la pussibilità da surtour las lavurs e chi sun eir prontos da surtour respunsabilità pel grond fabricat dals ultims decennis dal Cumün da Val Müstair.

Introducziun CMI

Daspö schner 2026 vain introdüt la comunicaziun cun la suprastanza sün via digitala. Quai ha funcziunà fich bain ed uossa seguan tuot ils oters uffizis inters sco forestal e tecnic. Grazcha a la gronda lavur da Manuela Gross chi ha surtut, sper sia nouva carica sco manadra da la chanzlia, eir l'introducziun e la scolaziun interna da noss collavurats. Nus eschan gnüts plü speditivs in suprastanza ed uschè resta eir temp per discussiuns strategicas per novs progets pel futur da nos cumün.

- Grettina Weber dumonda scha'l forestal nu pudess dar üna pitschna introducziun sur dal di dal god 2026.
- Jörg Clavadetscher infuorma cha'l di dal god 2026 ha lö in sonda, ils 06.06.2026. Ils temas da quist'on sun Val Brüna e Val Schais, svilup, privel e masüras da protecziun. Sco referents vain a Gian Cla Feuerstein, Richard Käch e Martin Keiser. Ün preavis segua i'l Mas-chalch dal mais mai e'l program detaglià vegn publichà, cuort avant l'occorrenza, i'l Mas-chalch dal mais gün.
- Mario Gross-Bass dumonda scha e co chi vegn cuntinuà cul proget dal Rom e declera la necessità da la realisaziun dal proget a Tschierv per pudair transferir ils cuosts al proget.
- La presidenta conferma ch'els han gnü l'eivna passada üna sezzüda e chi vegn prosegui cul proget. Eir els han guardà ils problems illas Palüds ingiò chi resultan cuosts plü gronds pervi da la negligenza dal mantegniment. Perquai nu pon tuot ils cuosts gnir transportats sül proget. In lügl 2026 dess avoir lö üna sezzüda d'infuormaziun cun las proprietarias, proprietaris, cultivaturas e cultivaturs dal terrain pertoc da las fracziuns Müstair e Tschierv e là vegn eir guarda ingiò chi vain cumanzà cul proget.
- Flurin Bott fa attent cha la situaziun dal privel da fö es eir in Val Müstair fich precara e cha la charta dal privel d'incendis da god muossa, pel Grischun e'l Puschlav, però be il s-chalin 3 - privel considerabel e na co i'l Tessin ingiò chi'd es gnü defini il s-chalin 4 - privel grond chi nu's das-cha in general far ingün fö i'l liber. El e la presidenta giavüschessan cha'l s-chalin da privel gniss augmantà eir pel territori da la Val Müstair sül s-chalin 4.
- Madlaina Gremlich declera cha'l s-chalin da privel vegn defini ed adattà mincha 2 – 3 dis dals uffizis. Els han la problematica sül radar ed as sun consciaint dal privel actual illas valladas dal süd.
- Riet Caflisch dumonda schi'd es previs o planisà ün proget per metter ad ir la via dal Runc a Fuldera.
- Florian Flechsig conferma ch'el ha contemplà la via e chi'd es previs da metter ad ir quella i'l proget da SIE 2027 / 2028.
- Ivo Lamprecht ingrazcha, in nom dals paurs, al cumün per la realisaziun ed a las votantas e'ls votants pel votum per la refacziun da la via Lü – Valmorain i'l proget SIE 2026 / 2027.

- Jon Gross, il guardgiasulvaschina infuorma sur da la populaziun da 5 lufs chi's rechatta pel mumaint in Val Müstair, dal luf tscharver sco eir dal uors chi's ha vis ultimamaing a Buffalora. El sensibilisescha e giavüscha d'annunzchar direct ad el tuot ils cas cuntschaints in connex cun bes-chas rapazas per ch'el po dar inavant las infuormaziuns al Chantun, quai chi'd es fich important, schi füss da far alch masüras.

La presidenta po serrar la radunanza cumünala ed ingrazcha a tuots per la cumparsa, per las discussiuns animadas e'l votum da plaina fiduzcha demuossà invers ils affars preschantats quista saira. Ella infuorma cha la prosma radunanza cumünala da rendaquint 2025 ha lö ils 03.06.2026 ed ingrazcha a nos pedel Beat Solinger per la preparaziun da la sala. A tuots giavüscha la presidenta il bun arriv a chasa ed üna bella prümavaira.

La presidenta:

L'actua:

.....
Gabriella Binkert Becchetti

.....
Manuela Gross